

Titu

Pauru okusiwa Titu pè maekwerà

Imovyvya

Aã kareta Janejare'e 'Āg omotekokuwa Pauru tokusiwa Titu pè maekwerà. Juteu rōwā mā'ē tē Titu. Ajamā'ē Jesu koty rewarà rōmō tē ekoi. Pauru oo taa taa rupi jane kō motekokuwa Jesu rekoa rē remē, ypō'ogwerà mitirōwā mā'ē pè oo teve poromotekokuwa iko. Kereta eu a'e ypō'ogwerà pè. Juteu rōwā māe kō rena tē a'e. A'e kyty oo remē, Titu oo upi. Ipātavōarà rōmō ekoi ipi. A'e pe wyi Pauru ojisyrytā remē, oity Titu a'e pè oo, tomotekokuwa jē Jesu koty rewarà kō iko. Ajaire kareta okusiwa imonooka ijupe, tokuwa Titu manyvo a'e wānā kō tomotekokuwa mā'ē.

Pauru ojikuwa Titu pè

1 ¹ Pauru tē ije. Janejare'e remīgwai tē ije. Jesu Kiristu remimonokwerà teve ije. Eremikusiwarerà aã kareta Titu pewarà. Janejare'e emono wemipyteporokwerà kō mokasiarà rōmō taiko. Amotekokuwa kō ijayvu aje ywete mā'ē rē, Janejare'e rekoa rupi katu toiko amē kupa ipi. ² Kee e'ipa itōkō Janejare'e janeupe ipi: “Erekoa rupi katu peiko remē, epyri peiko karuarutā kāramō”, e'ipa janeupewarà mō. Yvy jinō e'āve aepo e'ipa amātejē janeupewarà mō. Aje ywete ijayvu ipi. Iwari rōwā e'i ipi. Ajawyi “aje” taoty ijayvu pè ipi. Ajawyi ipyri jaikoa rā siārō ywete jaiko ipi. ³ Janejare'e tē wayvu mojenua 'arà opyteporopa amātejē. A'e 'arà okwa remē tē katu, “Age'e si eayvu katu tapemojenu ky'y”, e'i wayvu mojenuarà kō pè ipi. Eupe ve aepo e'i emono jane kō rovake. Ajawyi ijayvu rupi tē amojenu erokwa ipi, janerereko katuarà ayvu rupi tē. ⁴ Aã kareta akusiwa neupe, Titu. Ojevo jē jajirovija Jesu rē mā'ē tē jane. Ajawyi era'yre'e vo tē ene. Janeruwasi ikō tanerereko katu okatuaya rupi ipi nē. Tanepy'amopiryvypy katu teve ikō nerereko ipi nē. Kiristu Jesu janerereko katu mā'ē ikō ta'evo nerereko teve ipi nē.

Pauru omotekokuwa Titu iposikoa rā rē

⁵Aposiko jē nepyri remē itōkō, nisimoawyjepaive janeposikoa mokope mijā. Ajawyi mokope Kereta ypō'ogwerà pè oroity rā'ī aa remē itōkō, kee a'e ene: “Tereposiko jē ikō neiko nē”, a'e neupe. “Ikewarà kō ikō teremotekokuwa jē Janejare'e ayvu e'eay rē nē. Āmō, pirujē taa taa rupi Jesu koty rewarà kō rōvijā rā kō ikō terepyteporo nē, jōvijā poromo'e mǎe kō rōmō toiko kupa”, a'e itōkō neupe.^a Ajawyi tē itōkō oroity rā'ī a'e pē ajo.

Kōitokō jypy remē a'epa amātejē neupe, aekwerà rupi katu terepyteporo jōvijā poromo'e mǎe rā kō. ⁶Kee mǎe kō tē terepyteporo jōvijā poromo'e mǎe kō rōmō toiko kupa. Ojikuwa teāmā ivo mǎe rōmō iko mǎe kō terepyteporo. Nimovyvy ena'āi mǎe kō kōrijō tē terepyteporo. Āmō, pe'ite erekwa mǎe tē ikatu jōvijā rōmō toiko. Āmō, ivo ijākarā mǎe tē, ijākarā Jesu koty rewarà teve mǎe tē. Ajamā'e ijākarā kō ojavjavy tekoua e'e mǎe kō tē sō remē, terepyteporo e'ā apijarerà. Uu ayvu noerovijai mǎe kō ruu nikatu'āi nepyteporo remē. Uu ayvu werovija katu mǎe kō ruu tē terepyteporo tōvijā kō rōmō toiko.

⁷Janejare'e remīgwai tē jōvijā kō. Ijavvu katu rupi tē oposiko kupa ipi. Ajawyi nimovyvy ena'āi mǎe tē terepyteporo ipi, ava nivoi mǎe nomo'y'āi ee mǎe tē. Kee mǎe terepyteporo e'ā. Oje'ēgātā joupe ipi mǎe. Āmō, ojikōō teywete iko ipi mǎe. Āmō, omārakuwaa omoyvypyoka oka'ua pupe mǎe. Āmō, opoko teywete joe iko ipi mǎe. Āmō, karakuri moatya rē ywesō oja'a wyi poromoripe mǎe tē. A'evo mǎe kō rōwā terepyteporo jōvijā rā kō rōmō toiko. ⁸Kee mǎe kō tē terepyteporo. Mōropārā kō rē oja'a katu mǎe kō. Āmō, ivo tekoua opota katu mǎe kō. Āmō, ojireko katu Janejare'e rekoa rupi iko ipi mǎe kō teve. [Āmō, otekokuwavy ipi mǎe kō tē.] Āmō, ivo tekoua rupi katu ekoi mǎe kō tē terepyteporo. Āmō, Janejare'e remimota rē ywesō oja'a mǎe kō tē. Āmō, nivoi tekoua wyi ojireko katu mǎe kō tē. ⁹Tōvijā kō totekokuwavy Janejare'e ayvu rē. Kōitokō simo'e ee maekwerà rē totekokuwavy kupa. Aekwerà rupi katu tomosā'āga ayvu kō ipi. Āmē tē ava mō sō nivoi poromo'e remē, tōvijā kō okuwatā. “Janejare'e ayvu rupi katu rōwā aepe ere”, e'itā tōvijā kō amē ijupe ipi. “Kee Janejare'e ayvu e'i mǎe”, e'itā poromotekokuwa jē tōvijā poromo'e mǎe kō ipi.

¹⁰Oiko pe'irōwā oōvijāgwerà kō nomomojyi ipi mǎe kō, ijavvukwerà kō noenu tari mǎe kō. Oōvijā kō rē ojimoāpā mǎe kō. Āwī rapijarā kō Jesu koty rewarà kō pyterà rupi sikaepo ekoi ipi. A'e kō jamotekokuwa ipe remē, noenu tari kupa ipi. Oporegeta teitete jē ojiupe kupa ipi. Poromoripe tē kupa. Kee e'i rā'āga kupa: “Juteu kō rekoa rupi ve tapeiko

^a 1.5 Karai kō *presbitero* e'i Jesu koty rewarà rōvijā poromo'e mǎe kō pè.

Jesu koty rewarà kō rōmō”, e'i rā'āga kupa. [“Tapejiemosĩpire'ooka ikō ipi nē, Moisesi remikusiwarerà rupiwarà jikuwapa rōmō”, e'i rā'āga kupa.] ¹¹Wemikuwa rā'āga tē omojenu poromoripea rōmō kupa ipi. Ajamā'ē Jesu koty rewarà kō mō ojapyaka ywe'e tite ojimoripe rōmō āmē kupa. Kee e'i tite kupa: “Janejare'e ayvu teipō omojenu”, e'i tite enu kupa. Ajawyi ojavy ywe'e tite Jesu rekoa āmē kupa ky'y, opyriwarà kō revejē. A'e poromoripearà kō karakuri moatya rē ywesō oja'a ipi rewarà mō a'ēvo ekoi kupa. Kee e'i oupe kupa: “Eremimo'ekwerà kō wyi apyy wetetà karakuri”, e'i kōrijō tē oupe kupa ipi. Ajawyi a'ēvo ekoi mē kō pē taneayvukasi kee javo rōmō neiko: “Pepi a'ēvoa wyi! Ni'ei āwīvo remē”, tere ijupe kō imomi kō ipi. ¹²A'ēvo mē kō pewarà mō kee e'ipa Kereta vyv pewarà otekokuwa mē mō, karamoe remeve: “Iwari mē kō tē teāmā Kereta wānā kō ipi. Ojārō mē vo sō tite ekoi kupa ipi. Nijeweri mē kō tē kupa ipi. Ojimi'ua rē kōrijō tēgā ekoi kupa ipi”, e'i maekwerà. ¹³Aekwerà rupi katu tē poromoripe mē kō ekoi. Ajawyi taneayvukasi ijupe kō imotekokuwa kō ikenē, a'e ene, tuku. “Tapepoi āwīvo peikoa wyi ky'y!” ere ijupe kō. “Tete rā'ī!” ere ijupe kō. Maevo neayvu wenuā āmē kupa ky'y. Maevo Janejare'e ayvu e'e rupi ekoiā āmē kupa ky'y. ¹⁴Maevo Juteu kō rekoa rupi noiko'āi kupa ky'y. Maevo nojapyaka'āi poromoripe jē mē kō ayvu rē kupa ky'y, ayvu e'e wenu kupa rewarà mō. ¹⁵[Kee e'i teve poromoripe mē kō ipi: “Ja'umā'ē mō sō nisi'ui remē, maevo Janejare'e simoryokatā janere”, e'i tite kupa ipi, ikuwa e'ā. Ajare kee a'e. Janepy'a niky'ai remē, ja'umā'ē nomoky'a'āi. Janejare'e reminōgwerà tē pirujē ja'umā'ē.] Ajawyi ivo katuay jaiko remē, nijapoi eminōgwerà wyi ipi. Janejare'e reminōgwerà noporopy'amoai'āi ipi. Ajamā'ē ava mō ipy'a ky'a jē remē, nuvei ja'umā'ē mō poropy'aky'a'o mē, ipy'a ai jē rewarà mō. ¹⁶A'e kō: “Erōvijā ywete Janejare'e”, e'i tite kupa ipi. Ajamā'ē ojikuwa Janejare'e noerovijai mē kō rōmō kupa. Nivoi ekoia kō rupi ojikuwa kupa. Ojikō'ō ai tē kupa. Noerovijai kupa. Moma'e rōmō rōwā ekoi āmē kupa. [Ajawyi, “Nikatui āwīvoa”, tere ijupe kō ky'y, a'e ene.]

Jesu rekoa temimojenu

2 ¹Āmō, kee a'e ene, tuku. Jesu koty rewarà kō teremotekokuwa imokasi kō ipi. Jesu rekoa rē kōrijō tē teremotekokuwa kō ipi.

²Ika'akuwa sa'u mē kō pē kee tere imotekokuwa ipi: “Tapejireko katu ikō peiko nē. Temimoe'e rōmō ikō tapeiko ipi nē. Tapejimokasi ikō Janejare'e rekoa rē ipi nē. Āmō, tapejirovija ywete ikō Janejare'e rē ipi nē. Āmō, tapeuvay ikō āmō kō ipi nē. Āmō, tapepoi tite e'ā ikō Janejare'e rekoa wyi pejimomori'au ipe remē nē”, ere ikō ijupe kō nē. Aepo tere ika'akuwa sa'u mē kō imotekokuwa kō.

³Āmō, isa'imā sa'u mē kō pē kee ere teve: “Jesu ikō tapemomojy nē. Ivo ikō tapeiko ipi nē. Āmō, tapeayvu ai e'ā ikō peiko ipi nē. Āmō,

pemārākuwaa tapemoyvypyoka e'ā ikō peka'ua pupe ipi nē. Ivo tekoua rē ikō poromotekokuwa mǎe kō rōmō tapeiko nē”, ere ikō isa'imā sa'u mǎe kō pè nē. ⁴A'e kō tē ikō tomotekokuwa kōjāmuku kō ivo tekoua rē ipi nē. Kee te'i ijupe kō kupa: “Tapeauvay ikō pemēnà ipi nē. Āmō, pememyry kō ikō tapeauvay teve ipi nē”, te'i ijupe kō. ⁵“Āmō, tapejireko katu ikō peiko ipi nē. Āmō, pirujē aiwea wyi ikō tapejireko katu peiko ipi nē”, te'i. “Āmō, penetā rewarà rē ywesō ikō tapeja'a ipi nē. Āmō, tapeja'a katu ikō āmō kō rē ipi nē. Āmō, pemēnà kō ayvu rupi ikō tapeiko katu ipi nē”, te'i isa'imā sa'u mǎe kō kōjāmuku kō pè imotekokuwa kō. A'evo ekoi kupa remē tē āmō kō kee e'ità ee kō omājā: “Haa! Ikatuay wete Janejare'e ayvu!” e'ità kōjāmuku kō rē omājā. Ava jē rōwā kee e'ità āmē ee kō omājā: “Nikatui maevo Janejare'e ayvu”, ava jē rōwā e'ità.

⁶Āmō, kōnomiōkyrerà kō teremotekokuwa teve imokasi kō, āwisō tojireko katu teve kupa. ⁷Ene teve, tuku. Ivo ikō eiko manyvo neiko remē ipi nē. Āmē tē kōnomiōkyrerà kō nereruparà mō ekoità. Āmō, taneroaory katu ikō neremimotekokuwa kō rovake ipi nē. ⁸Ajamāē ivo katu teremotekokuwavy jane kō pirujē Janejare'e ayvu e'eay rē ipi. Nerejavyi ijayvu rē poromotekokuwaa rē remē, janeāpā kō nivoi mǎē manyvo nomo'y'ai nere. Ojimosiokatà kōrijō tē nere omājā āmē kupa, wayvu ai paire.

⁹Āmō, temīgwai temippykwerà kō pè kee tere teve:^b “Penōvijā kō ayvu ikō taperovija ipi nē. Tapemory ikō penōvijā ipi nē. Tapeayvuvaja vaja e'ā ikō penōvijā kō ipi nē. ¹⁰Āmō, tapemona e'ā ikō penōvijā ma'e rē ipi nē. Ivo ikō tapeiko ipi nē. A'evo peiko remē, temimoe'e rōmō peikotà āmē”, tere ijupe kō. “A'evo peiko remē, kee e'ità āmō kō pene omājā: ‘Emāē ee kō! Jesu rekoa rupi katu ekoi kupa ipi! Aje, ikatuay wete Janejare'e rekoa ipi! Ikatuay wete Janejare'e poroereko katuarà rōmō ekoi!’ e'ità pene omājā kupa”, ere temīgwai kō pè.

¹¹Janejare'e okatuaya rupi janerereko katu ipi. A'evo poroerekoa omojikuwaokapa pirujē jane kō pè ky'y, Jesu Kiristu rupi. ¹²Ajawyi kee Janejare'e opota tijaiko Jesu koty rewarà kō rōmō, ike yvy pewarà kō pytery pè jaiko jē remē. Janejare'e rekoa rupi tē jaiko ky'y. Nivoi tekoua wyi ikō tijajireko katu ipi nē. Noerovijari mǎe kō remimotarà rē tijajitupi e'ā ipi. Janejare'e py'a rupi katuwarà kō rōmō tijaiko ipi, emireko katu kō rōmō. Ivo katua rupi tijaiko ipi. ¹³Kāramō Jesu Kiristu janerereko katuarà rōmō uu tarà mijē [janepijarà mō janereraa wena kyty]. Jōvijā wasu rōmō ojikuwatà uu. A'evo remē Janejare'e kasia ojikuwatà uu. A'evoa rā simoa'u jē jaiko age'e. Ajawyi siārō jē jaiko remē, ivo tijaiko jē ipi, a'e ene. ¹⁴Jesu ojjukaoka janerereko katuarà rōmō. A'evoa rupi pirujē nivoi jaikoa wyi janemomoipa. Ivoay rōmō janereinō, āwisō owaray

^b 2.9 Oposiko karuaru oōvijā pè mǎē. *Escravo* e'i karai kō ijupe mǎē.

tijaiko ijupewarà mō. Weruparà mō janereinō janerereko ipi. A'evoa rōmō janereinō.

¹⁵A'evō 'evoa kō rē teremotekokuwa kō imokasi kō, Titu. Noenui neayvu mǎe kō ikō teremotekokuwa jē ipi nē. Ajamǎ'ē ava mō sō nivoi jē ekoi remē ikō, emogeta kō jē āmē nē. “Terejimoteepa ikenē” ere ijupe neayvukasi rōmō. “Ajamǎ'ē eayvu rupi rōwā aporegeta neupe. Janejare'e ayvu e'e rupi tē aporegeta ipi, nerōvijā rōmō”, ere ijupe ky'y. Terejierōarōoka e'ā ava mō pē.

Ke tijaiko Jesu koty rewarà kō rōmō

3 ¹Ke tere Jesu koty rewarà kō pē imotekokuwa kō: “Jōvijā kō ikō tapemomojy ipi nē. Kovenatu tapemomojy. Wǎisō. Tapenova maramota katu ikō ikoty kō ipi nē”, tere ijupe kō. Āmō, kee ere ijupe kō: “Taperovija katu ikō penōvijā kō ayvu ipi nē. Ivo tekoua rē ikō tapeewe katu ipi nē. ²Āmō kō reve tapeayvuvaja vaja e'ā. Āmō, tapejierōarō e'ā teve peiko. Joova rupi katuwarà mō tapeiko āmō kō pytery pē ipi nē”, tere Jesu koty rewarà kō pē imotekokuwa kō ipi.

³Ke rewarà mō aepe a'e ene. Jypy remē itōkō jane ve nivoi jaiko ipi mijā. Aja paire tē Jesu koty rewarà kō rōmō jane jaiko ky'y. Nijatekokuwai 'ete itōkō mijā. Nijajapyaka tari teve Janejare'e ayvu rē ipi mijā. Janejare'e ayvu rupi nijaike tari mijā. Janeremimota ai kasia rupi tē jaiko ipi mijā. A'evō jajimoripe jaiko ipi mijā. Jajipokuwa ivo e'āa rē ipi mijā. Nijajireko katui jaiko ipi mijā. Poromoai teve jaiko ipi mijā. Jajimōarō teve āmō kō pē jaiko ipi mijā. Jajikō'ō teve āmō kō rē ipi mijā. Janerovaja jē janere ojikō'ō rōmō kupa ipi mijā. [Ajawyi, tijajirojivy e'ā ikō aekwerà kyty nē.] ⁴Ajamǎ'ē a'evō jaiko jē ipe remē, Janejare'e janeporijauesa jē, janerereko katuwarà rōmō. Nivoi jē jaiko ipe remē, janerauvay jē. ⁵Janerereko katupa teāmā. Ivo jaiko rewarà mō rōwā janerereko katu. Aje ywete, poroporijauesa rewarà mō tē. Ajawyi i'Āg kasia janepy'aky'a'opa janemoteepa ky'y. Janepyaukwerà rōmō janereinō janerereko ky'y, janeporijauesa rewarà mō. O'Āg rupi a'evō janerereko. ⁶Nokāte'āi Janejare'e o'Āg me'ēa rē janeupe, Jesu Kiristu remireko katu kō rōmō. ⁷Okatua rupi janeaiwererā oityypyypipaoka janewyi. Ivo mǎ'ē rōmō janerereko ky'y. “Poroereko karuarutā epyri”, e'ipa janeupe. [A'evoa rā siārō jē jaiko. A'evoa rōmō tē o'Āg ome'ē janeupe.] ⁸Aepe a'e mǎ'ē aje ywete. Ajawyi apota teremotekokuwa kō aepe rē. Taneewe katu ikō poromotekokuwaa rē ipi nē. Eremikusiwarerā rē pirujē teremotekokuwa kō ipi. A'evō neiko remē, Janejare'e rē ojirovija mǎe kō Jesu rekoa katu okuwatā āmē ky'y. Ojimokasitā ivo tekoua rupi toiko āmē kupa. Āmē sōsi owaray jaikotā ky'y. Ikatuay a'evō jaiko remē ipi.

⁹Ajamǎ'ē oporegeta teywete mǎe kō rē ikō terejapyaka e'ā ipi nē. A'e kō opota tite Janejare'e ayvu wyi poromomoioaka. Āmō, opota penōvijāgwerā

karamoe remēwarà kō rekoa rè terejimo'eai. Āmō, opota tāmō Moisesi remikusiwarerà ivo tekoua rewarà rè ojiaiyvuvaja vaja teve kupa. Terejiayvuvaja vaja e'ā eeve kō ajamā'ē. Manyvo rā mō rōwā aepo rè nejiayvuvaja vaja. Noporomokasi mā'ē tē aepo āmē. Noporomotekokuwai mā'ē teve. ¹⁰Kee tere oporegeta teitetea rupi poromoe'yitā tite mē kō pē: “Aepo pejē sō, poromotekokuwaarà rā'āga kō!” ere ijupe kō ipi. Ojimoane'e jē sō kupa remē, aepo ere mijē ijupe kō. Mōrijō 'arà tesō aepo ere ijupe kō. Āmē tē neayvu rupi noikoi sō kupa remē, teremoisyry āwī rapijarà Jesu koty rewarà kō pytery pe wyi imono ky'y. [Kee rewarà mō. Noja'a'āi opy'a tekokuwaa rè kupa rewarà mō.] ¹¹Kee nekuwapa āwī rapijarà kō manyvo jē ekoi. Nivoi ekoi kupa ipi. Jesu rekoa e'e rè noja'ai kupa ipi. Janejare'e ayvu nopotai teve kupa ipi. Weko aiwerà règà ojimoane'e jē kupa ipi. Ajawyi ojikuwa Janejare'e omomorijautā mē rā kō rōmō kupa.

Kareta moawyjepaa

¹²Amoawyjepatā eayvu ky'y. Kee a'e jē ene. Epātavōarà Atēmā amonotā rā'ī nerekovijarà mō toposiko iko. Atēmā nooi remē, Tikiku tē amonotā. Mokope ovāe remeve ejo kuise'ē jē ekoty. Nikopori taa pē aatā āmānā kyropy e'āve. Ajaate kwaray ypy remē a'e pē ajutā. Ajawyi a'e taa kyty ikō tereo eresa nē, a'e neupe. ¹³Āmō, Sena eu erā pē mā'ē okwatā nerena rupi. Ayvu pojy kuwaparā^c tē a'e. Āmō, Aporu eu erā pē mā'ē ve okwatā Sena rupi. Terepātavō kō ikō nerena rupi okwa kupa remē nē. Ajaire oo jētā kupa remē, emiporu rā kō tereme'ē ikō ijupe kō toeraa kupa nē.

¹⁴Āmō, kee a'e ene. Tijaneewe katu japosiko, āwisō ivo katua rupi tijaiko, Jesu koty rewarà kō rōmō. Nijanerako'i'āi āmō kō rè āmē.

¹⁵Ike epyriwarà kō opota ojimory nere kareta akusiwa mā'ē rupi, pirujē epyriwarà kō. Āmō, mokope orerauparà kō rè teve oropota orojimory, Jesu rè ojirovija mē kō rè.

Jōvijā wasu Jesu ikō tapenereko katu okatuaya rupi ipi nē.

[Awyjepa eremikusiwarerà neupewarà ky'y.]

^c 3.13 Poroepyka (*advogado*)